

HM JK VISIT

مرکزی وزیر داخلہ امت شاہ آج تین جموں کشمیر گو ایک اہم ترے روزہ دورو شروع کریں گا تاکہ حفاظت ترقیاتی منصوبوں کو جامع جائیزو لیو جاسکے تے سیاسی شراکت داراں نال گل بات وی کی جاسکے آکاشوانی جموں گا نامہ نگار غی رپوٹ غے مطابق اس دورہ مانہ نظم و ضبط حکومت غی کارکردگیاں تے بنیادی ڈھانچہ واسطے چایا گیا اقدامات گو جائیزو لین واسطے حفاظتی ایجسٹیاں تے انتظامی حکام غے نال اعلیٰ سطحی میٹنگ کرن غی توقع ہے وزیر داخلہ اس دورہ غے دوران حفاظتی صورتحال گو جائیزو لین غے نال نال سیاسی لیڈراں نال گل بات کریں گا تے بکھ بکھ ترقیاتی منصوبوں کو افتتاح کریں گا آج شام 5 بجے جموں پُجن غے بعد سیدھا لوک بھون جین گا جت وے سیاسی لیڈراں نال ملاقات کریں گا۔

CM CANCER DAY

وزیر اعلیٰ عمر عبداللہ نے کہیو ہے کہ حکومت کینسر غا مریضوں تے طبی عملہ نانہ بہترین سہولیات فراہم کرن واسطے سنجیدگی تیں کم کرنی ہے انہاں نے یاہ گل سرکاری میڈیکل کالج جموں مانہ عالمی یوم کینسر غا موقع ور منعقدہ ایک تقریب سنگ خطاب کرتا واں کئی یوہ پروگرام جموں کشمیر کینسر غے خلاف جدوجہد غا موضوع غے تحت منعقد کیو گیو تھو وزیر اعلیٰ نے کہیو کہ صحت غا نظام نانہ مضبوط بنان تے عوام نانہ معیاری علاج فراہم کرنو حکومت غی اولین ترجیح ہے۔ انہاں نے امید ظاہر کی ہے کہ ایک دن ایسو آوے غو جد کینسر غو مکمل خاتمو ہو جے غو تے دنیا حقیقی معیناں مانہ عالمی یوم کینسر مناسکے غی۔

CM SMGS BLOCK

وزیر اعلیٰ عمر عبداللہ نے کل ایس ایم جی ایس اسپتال جموں مانہ 243 بستراں ور مشتمل نوازچگی بلاک غو افتتاح کیو۔ اس جدید بلاک ور 31.59 کروڑ روپیاں غی لاگت آئی ہے۔ یہ جدید سہولت کریٹیکل کیر حمل خدمات تے آپریشن تھیٹر کمپلیکس تیں لیس ہے۔ جس سنگ جموں خطہ مانہ ماں تے بچہ غی صحت تیں متعلق خدمات مانہ نمایاں بہتری آوے غی۔ اس موقع ور وزیر صحت سکینہ اتو، مشیر ناصر اسلم وانی تے ایم۔ ایل۔ اے جموں ایست یدھویر سیٹھی وی موجود تھا۔

Dy CM NCC CADETS

نائب وزیر اعلیٰ سریندر چودھری نے کل جموں کشمیر تے لداخ این۔سی۔سی ڈائریکٹوریٹ غا کیڈٹس تیں ملاقات کی۔ ان کیڈٹس نے یوم جمہوریہ کیمپ 2026، نوی دہلی مانہ شاندار کارکردگی غو مظاہرو کیو۔ کنونشن مرکز جموں مانہ خطاب کرتا واں نائب وزیر اعلیٰ نے کیڈٹس غا نظم و ضبط، اعتماد تے لگن غی تعریف کی۔ انہاں نے کہیو کہ کیڈٹس نے قومی سطح ور جموں کشمیر غو ناں روشن کیو ہے تے سچا سفیر غو کردار ادا کیو ہے۔ انہاں نے مزید کہیو کہ این۔سی۔سی سرگرمی نوجواناں مانہ اتحاد، حوصلہ تے نظم و ضبط نانہ فروغ دے۔

SATISH CINEMA

وزیر ستیش شرما نے کل جموں غا مووی ٹائیم سینما اندر اتھیٹر مانہ منعقدہ ایک خصوصی فلمی تقریب بٹ کوچ غے دوران مقامی فلم سازاں تے ثقافتی فنکاراں غی کوششاں غی تعریف کی۔ اُنہاں نے کہیو کہ یہ لوگ فلماں غے ذریعے کشمیری زبان ، روایات تے روز مرہ غی زندگی مانہ فروغ دے رہیا ہیں۔ اس موقع ور خطاب کرتا واں وزیر نے کہیو کہ علاقائی سینما ماری ثقافتی پہچان مانہ محفوظ رکھن تے جموں کشمیر غا قیمتی ورثہ مانہ آن آلی نسلان توڑی پُجان مانہ اہم کردار ادا کرے۔ اُنہاں نے کہیو کہ بٹ کوچ جیسا پروگرام کشمیری تاریخ ، جزبات تے سماجی زندگی ور مبنی حقیقی کہانیاں مانہ پیش کرن واسطے ایک مضبوط پلیٹ فارم فراہم کرے۔

KISHTWAR ENCOUNTER

کشتواڑ ضلع مانہ گزشتہ روز ایک مشترکہ کارروائی غے دوران حفاظتی دستاں نے ایک دہشت گرد مانہ مار مکایو۔ وائٹ نائٹ کور نے سماجی میڈیا ایکس ور دسیو کہ آپریشن تراشی ایک جاری ہے تے ایک دہشت گرد ہلاک ہو چکو ہے۔ مارا نمائندہ غے مطابق کشتواڑ غا چھاترو غا دیچھڑ علاقہ مانہ حفاظتی دستاں غی مشترکہ ٹیم آپریشن مانہ مصروف ہیں ، جن مانہ دو پیرا سپیشل فورسز وی شامل ہے۔ یوہ ٹاکرو اُس ویلے شروع ہوو جد حفاظتی دستاں مانہ ایک سو لہی کہ علاقہ مانہ دہشت گرد موجودگی ہیں تے اُنہاں نے گھیراو کرغے تلاشی کارروائی شروع کی۔

DC JAMMU CHAKROI

ڈپٹی کمشنر جموں ڈاکٹر راکیش منہاس نے کل سوچیت گڑھ ہلاک غا اپر چکرائی علاقہ مانہ ہلاک دیوس پروگرام غی صدارت کی۔ اس موقع ور اُنہاں نے عوامی مسائل سنیا تے متعلقہ محکماں مانہ ہدایت دتی کہ شکایات غا معیاری تے ویلے سر نمیزہ مانہ یقینی بناویں۔ ڈپٹی کمشنر نے یقین دوايو کہ آبپاشی غو پانی آخری سرا توڑی پُجایو جے غو۔ اُنہاں نے کہیو کہ نہراں مانہ شفاف تے مناسب پانی غی روانی برقرار رکھن واسطے ایک جامع منصوبہ تیار کیو جے غو۔ اُنہاں نے عوام تیں اپیل کی کہ وہ پانی غا ذخائر مانہ کچرو نہ سٹیں تے پائیداد ترقی واسطے تعاون کریں۔
